

Date – 16/12/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n ZPM sawrkar hnuaiah hnathawh muang leh hna chhia bakah a huna zawh loh chu pumpelh an tum a ti a, hnathawh tinreng viltu an nei tih a sawi.
2. Health Minister Pi Lalrinpuui'n Mizoram Universal Health Care Scheme hnuaiah damlo mi 59,602 enkawlna senso cheng vbch 100 chuang pekchhuah ani a ti.
3. MNF President Pu Zoramthanga'n MNF chu Mizoram tan, harsatna su tura Pathianin a din a ni, a ti.
4. Prime Minister Narendra Modia leh Jordan Lal King Abdullah II te chuan vawiin khan India-Jordan business forum, Amman ah an hmanpui.

<><><>

CM LAYS FOUNDATION STONE

Chief Minister Pu Lalduhoma'n ZPM sawrkar hnuaiah hnathawh muang leh hna chhia bakah a huna zawh loh chu pumpelh an tum a ti a, hnathawh tinreng viltu an nei tih a sawi.

Vawiin khan Chief Minister Pu Lalduhoma chuan Aizawl Zotlang Venga Mara Boys Hostel-ah Mara Girls hostel sakna tur, MADC area-a school thar pariat (8) sakna leh school awmsa paruk (6) chei tharna tur lungphum a phum. Heng zirna inte hi PMJVK atanga sak tur an ni.

Chief Minister chuan sawrkar hna muang leh hna chhia an duh lo tih sawiin Project Monitoring Committee chuan vawiin thlengin project 87 an endik tawh a ti a, hnathawktuten chak takin hma la se an duh tih sawiin an sawrkarah dik taka hnathawh an duh tih a sawi.

Pu Lalduhoma chuan vawiina lungphum a phum chu Mara zirlai 3200 ten tangkai takin an chhawr zui thei dawn a ti a, an hmalakna chuan MADC an ngaihthah lohzia leh hmeichhiate chawikanna kawnga hna an thawhzia a tilangah tih a sawi bawk.

School building thar pariat hi cheng vbch 5.76 senga sak tur niin, RCC, a chung rangva, building 1 ah room 12 zel awm tur niin, hunbi tuk chhunga zawh tum

a ni. School paruk thuam thar hi cheng vbch 8.59 senga thawh tur a ni a, smart class room dah tur a ni bawk.



VIJAY DIWAS 2025

India ram hmun dangte rualin tukin khan Vijay Diwas (Hnehna Ni) pualin War Memorial, Treasury Square-ah Chief Minister Pu Lalduhoma hovin sipai huaisen, ram tana nun hlantute hriatrengna leh zahna lantirna hun hman a ni.

Pu Lalduhoma chuan hma hruaiin Sipai huaisen martarte zahna lantir nan War Memorial-ah pangpar a dah a, Home Minister Pu K. Sapdanga te, MLA Lt. Col. Clement Lalhmingthanga bakah sawrkar mi pawimawh dangten pangpar hi an dah zui a ni.

Lunglei District ah chuan Vijay Diwas lawmna hi Lunglei District Sainik Office huaihawta hman niin, 20 Assam Rifles, 2 Mizo Battalion NCC leh Mizoram Ex-Services League Lunglei atangin sipai, cadet leh sipai bang eng emaw zat an tel a. Ram tana nun hlantu sipai huaisen martar te leh ram tana huaisen taka beitu sipaite hriat reng nan leh anmahni zahna lantir nan sipai inchawimawi dan famkim nen urhsun taka hun hman a ni.

Champhaiah chuan War Memorial hmunah India leh Pakistan indonaa sipai boral te hriatrengna ni Vijay Diwas chu hman a ni. Addl. DC Pu James Lalnithanga leh sawm bik chi hrang hrang mi 13 in sipai huaisente hriat reng nan pangpar an dah a ni.

December ni 16, 1971 khan Ramna Race Course tuna Suhrawardy Udyan ni ta, Dhaka khawpui, Bangladesh-ah India Sipai hotu Lt. Gen. Jasjit Singh Aurora kaihruai India sipai leh Mukti Bahini hmaah Pakistan sipai lalber Lt. Gen. Amir Abdullah Khan Niazi leh a sipai 93,000 te chu Indo-Pakistan War of 1971 ah India laka tlawmin an inpe a. He hnehna vang hian East Pakistan, tuna Bangladesh tia thlak tak hian Pakistan atangin zalenna a hmuh phah a ni. He ni hriatrengna atan hian kumtin Vijay Diwas hi India ram hmun tinah leh Bangladesh-ahte December ni 16 ah hman thin a ni.



HEALTH MINISTER

Health Minister Pi Lalrinpui'n Mizoram Universal Health Care Scheme hnuaiyah damlo mi 59,602 enkawlina senso cheng vbch 100 chuang pekchhuah ani a ti.

Vawiina khan a pisa ah chanchinbu mite kawmin Health Minister chuan kumin sorkar tangka kumthar April ni 1 atanga vawiin December ni 16 inkarah Mizoram Universal Health Care Scheme hnuaiyah damlo mi 59,602 enkawlina senso cheng vbch 100 chuang sen ral ani tawh a ti a, Mizoram Universal Health Scheme in senso a tumsak damlo zinga 68.56% chu sawrkar damdawiina enkawl an ni a ti.

Pi Lalrinpui chuan MUHCS chungchangah Private Hospital thenkhat zingah Mizoram sorkar thawpui tum an awm mek thu sawiin thawhhona tur thuthlung pawh ziah fel a nih tep tawh a ti a, Kohhran hrang hrang Damdawiin te pawhin mipui

rawngbawlna a ni tih hria a health care chungchangah sorkar hmalakna an rawn zawm chu a lawmawm atih thu a sawi.

Health Minister chuan Mizoram chhunga district hospital hrang hrang an lun thu leh Civil Hospital, Aizawl chu a khat reng a ti a. Zoram Medical College & Hospital chu khum 520 nei thei tura tihlen a nih bakah, Cabin pindan 40 pawh damto te tana peih fel a nih thu te a sawi bawk.

<><><>

WINTER FESTIVAL

Tourism Minister Pu Lalnghinglova Hmar in Mizoram mawina leh boruak thianghlim chu state dang mi leh khawvel hmun danga cheng ten an hmuh theih tura phochhuah tam a pawimawh thu a sawi.

Nizan khan Tourism Minister Pu Lalnghinglova Hmar chuan ni 7 awh tur Winter festival chu Lammualah a hawng a, Festival chu Mizo mipuite leh thalai te hlimtak leh thianghlim taka an in hmuhkhawmna tur, khualzin hip theihna tur leh Mizoram mawina leh boruak thianghlim te chu state dang mi te leh khawvel hmun danga miten an hmuh a an chhim ve theihna tur te a buahsaih a nih thu a sawi.

Festival hi December Ni 15 atanga 20 thleng hman phawt a ni a nga, Ni 23-ah Christmas Parade neiin ropui taka khar a ni dawn a. Parade hi Chanmari kawn atanga tan tur a ni anga, hemi hunah hian zaithiam te, milar hrang hrang te leh mipui te kalkhawmin Christmas costume kan neih ang ang te inbelin Lammualah Christmas Carol a chhonzawm a ni ang.

Pu Lalnghinglova Hmar chuan December ni 31 a hman tur, Sakawrhmutuaitlang atanga kum khata nitla hnuhnungber thlir hona neih turah mipui te, a tam thei ang berin chhim turin a sawm a. Minister hian Kum 2026 atana Mizoram Tourism in Calendar an siam chu a tlangzarh nghal a bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

EXODUS DAY

MNF President Pu Zoramthanga'n MNF chu Mizoram tan, harsatna su tura Pathianin a din a ni, a ti.

MNF President hian vawiin khan MNF Exodus Day 54-na leh Lunglei Hnam Run kharna puala inkhawm a hmanpui na ah sawiin Pu Zoramthanga chuan December ni 16 chu India sipaite tan hnehna ni ropui, an hmelma Pakistan tlawmna

ni 'Vijay Diwas' a nih rualin MNF sipaite tan pawh Pakistan sipaite lak atanga chhanchhuahna ni ropui 'Exodus Day' a ni, a ti a. Harsatna su turin Pathianin MNF chua tir atangin a din a, a sutlangtir thin tih sawiin kum 64 lai tluang taka a kal nachhan chu Chanchintha hril tura a hnam thlan an nih vang tih a sawi.

Pu Zoramthanga chuan Pathian hruaina in Dampa bial bye-Election ah MNF a chak thu sawiin, Kum thar 2026 AMC Inthlanah MNF party chuan sawrkarna an chan leh ngei a beisei thu sawiin ZPM Sawrkar chu mumal lo takin a kal mek a, mipui mithmuha saiip puan sin chungin zu zawrh phalna an pass a ti a, State University chungchangah pawh Mizoram Legislative Assembly in a pass tawh awlsam takin thlak an tum tih sawiin mumal lo takin Mizoram an hruai mek tih a sawi.

Exodus Day pual hian Aizawl Hnam Run ah pawh inkhawm niin MNF Sr Vice President Dr R Lalthangliana chuan MNF dinchhan chu Mizo hnam dinchhuah tir leh Kristian sakhua humhalh tlat a ni a ti a, harsatna tam tak tawh mahse a hun takah malsawmna an hmu mai thin a ti a, MNF Vice President Pu Lalchhandama Ralte chuan thu a sawina ah Lai District Council inthlanah an duh danin thil a thleng theilo a ti a, Sawrkar siam an mamawh avangin ZPM nen an thawkho dawn a ti a, hei hian State ah an thawkho tihna a nilo tih a sawi bawh.

<><><>

RD MINISTER

Rural Development Minister Prof. Lalnilawma'n a bial chhung, Seling leh Keifang thlai thar bazar a thute tan leh Saitual a rubber chingtute tan ni zung chakna hmanga eng pekchhuahna wawin khan a hawng.

Professor Lalnilawma chuan Mizoram sorkarin kuthnathawktute tana tangkai tak ni zung hmanga eng pekchhuah kawngah theihtawp a chhuah mek a ti a, SELCO Foundation leh a MLA fund kal tlanga hmalakna Solar light chu dimdawi tak leh uluk taka enkawl tur leh tangkai taka an hmang turin a bial mipuite a chah a, Seling leh Keifang a chawmhah zuar tute'n chhun zan a ni chakna hmanga eng an chhi thei tur chuan an eizawna bakah an sum lakluh pawh a tih pun ngei a beisei thu sawiin Saitual Rubber Producer Society te pawh an Solar light chuan an hnathawh na lamah nasa taka a puih mai bakah, rubber thar chhuah kawngah pawh hma an sawi ngei a beisei thu a sawi bawh.

<><><>

PM

Prime Minister Narendra Modia leh Jordan Lal King Abdullah II te chuan wawin khan India-Jordan business forum, Amman ah an hmanpui. Hruaitu pahnihte hian ram pahnih thawhdunna kaltlanga ram eibar hmasawna tur ruahmanna hrang hrang an puang a. He hunah hian ram pahnih atangin sumdawng lian aiawhte an tel a. Leitha siamna lamahte, textile lamahte leh energy thianghlim siam chhuah kawngahte, information technology leh health sector lamahte thawhhona tur an sawiho a ni.

Prime Minister Modia chuan thusawin India-Jordan inlaichinna chu a danglam bik tih sawiin hman ata tawh inrintawna a awm thu leh eibar zawna kawngah hmalam hun thui tak an thlir tih a sawi bawh a ni.

Vawiin business forumah hian thawhdunna tur inremna chi hrang hrang an ziaak a.

Hemi hnu hian PM Modia hian Ethiopia khawpui Addis Ababa panin a chhuak leh nghal a ni.

<><><>

MNREGA

Vawiin Lok Sabha-ah Mahatma Gandhi National Rural Employment Guarantee Act, 2005 (MGNREGA) thlakna tur bill putluh a ni. He bill hi a hmingah Viksit Bharat-Guarantee for Rozgar and Ajeevika Mission (Gramin) Bill,2025 tia vuah a ni a. Union Agriculture Minister Shivraj Singh Chouhan chuan bill hi house ah a pulut a. Thusawiin tunlai dan thar nena her rema Viksit Bharat 2047 nena kal dunin dan thar siam an tum a ti a. He dan tharah hian thingtlanah kum khatah ni 125 inhlawhna tur siam a ni ang a ti a. Prime Minster Narendra Modia kaihhruaina hnuaiyah mi retheite dawmkanna turin welfare scheme hrang hrang siam a ni a ti bawk.

<><><>